

清容居士集

三

清夜讀書志亦迂
其意不異隨侯珠
市價不遠遺神錄
予孫世之何其悲

清容居士集卷第一

賦

導游賦

陳郡袁桷家于甬之隅足不踰閩而四方
交游往復之義亦能舉其槩聞吳興子昂
趙子清名雅言為作導游賦道予所蘊亦
以見夫思其人而不可見之意詞曰

嘗悲乎好游之士閱終歲而莫聞非秉志
而媚私亦飾行以矯群方其命車於王良
假驂於造父過屠繒之沛弔弦歌之魯許

身結志慷慨偃僂抗銅盤以矢辭握幽蘭
而結賦炫華堂之冰雪眇脩途之霜露蓋
將脩斷金之利雖闕墻而莫我敢侮息肩
于門晞髮于廬不一歲月迨見夫蠅聲而
歌倚楹而吁雖千里之異殊何老壯之卒
逾也世有索居肥遯整門塞竇尊委俚之
聞友汗青之朽是猶談智於尺寸測日於
戶牖猛虎嚙爵幽猱悲啾獨行無儔謹操
其翰絜彼一士與時偕藏具大塊之清淑
服忠厚以自昌余將往而未得倚吳山以

相望振衣中庭萬籟寂玄頽形廣穎眴兮
翩翩墜余以言曰懷辛之柎人或議其妖
充梁之木人或惡其獨夫既自以為直而
亦豈不以為曲阮生自持幾於目語削木
已湯假手于祖匪達人之曠羈終察察乎
廉隅余鞮然而笑喟然而思拂龜以占莫
測其疑抑搔首而歎歎故髣髴以致期遂
伸之以辭回城之璧佩以容兮環龍之劍
喜其鋒兮伊若人兮物不可同兮我欲從
兮樂有終兮江山兮復長方舟兮可航辭
未竟童子擁篲而前曰豈所謂千載之人
耶吾當從子而西矣

雲林賦

若知雲乎昭昭然服光以廣微隆然廓然
又侶夫五色萬物而沈幾來弗以趾去弗
以馳其始也盤辟夾輔輪輪困困孰合其
處所其終也寸芒以興導轟轟啓鈴鈴汨
沮洳襄丘陵若慕而佇若泣而赴愀兮哀
不知所訴婉蟬眇綿含英吐鮮道傾蓋而
忘返粲接席以爭先誠果樂乎莫與之宣

形成乎無形名生於有名囿于家林允為
儀刑奉著占之曰居高而卑佩矩帶規升
于木無往不復不泄不辱言歸其谷伊南
維湖將以為居齊三日祝而蒞諸蒼兮中
峰式瞻其端為章為祥為輪為冠風以潤
之雨以需之挾陰而嘘乘陽而舒朝飛夕
躋莫窮其極有翼者鵠遵于其涯曰將有
行自東徂西綏而迎之維壟之崇施而流
之維泉之通以沐以容是謂雲林之宮

玄雲石賦

清石卷一具其一

泗流迴淵禹朝步兮乘陰發竒靈鼇負兮
玉質墨章浮帝都兮廉辨以清協磬濩兮
堅剛洞虛積元感兮磅礴太素屹空嵌兮
靜居泊如日儀以湛兮虛一闡圖握九讚
兮八方宣明二儀竅兮抱形介貞合窈眇
兮細細緼緼道之奧兮鞏稱玄雲吾將以
觀衆妙兮

淳賦

粵若邃古仁風熙熙擊壤灌陰以佚以嬉
巷無夭瘥物無癘疾祥麟應囿靈龜負池

樂以導和禮以黜哀齋齋其春渾渾其天
守冲若虛不夸不鑄佩矩帶規養於深淵
擬諸樸兮文理具宣擬諸象兮充然混完
見不以迹視不以形斟酌大和胚胎粹精
居之莫疑神維壹清若有若三訖莫可名
二儀絢緼肇分化醇人行乎中孰全其真
注茲玄酒淡兮在尊御史氏尹敏學潛珍
服習典謨葆厥靈根齋居靜儀人莫可聞
攷諸庖犧其名曰淳

玉龜杖賦

清容居士集卷一

有璞於此純淪氤氲瑤光之精為靈為文
謹櫝以藏不泄孔温穹隆中乾夷靜合坤
淵淵其容深深其神爰有善木含章揚芬
飾端以儀往來無垠鬱我壽宮有繁者雲
維季翼翼聿懷彼瀆跪而祝諸以奉番君
曰履道坦而元吉者歟任重而不希其力
者歟視下而無危嬉戲如兒審時而行得
良以防抑心自强底夫康莊其形不孤其
智若圓化而神之曷知其遷以相以持是
謂期頤

桐柏觀賦

孫興公天台賦運意高簡忘象以求斯得
之凝和盧君居是山以桐柏觀圖授余曰
子為我續繹其景不揆瓦石援筆為之賦
曰

厚坤載德台山效靈蜿蜒扶輿天孫之精
僊書易之以桐柏啟神界為金庭轆轤三
光磅礴太空睇暘谷之倒景卒莫能擬諸
形容也睠彼華頂群山啓蹤侶九牧以執
玉魏冠仰其顛顛香林玉霄夾驂以從華

林不彫卧寵從寵玉泉御右法蓮殿戎東
峙翠微西躡紫霄巧面勢以規輔玄扃沉
沉乎沈寥維妙有之珍館匪攀援之可求
除三彭之內蕩守中戒以默脩影息於鄧
林機忘於海鷗上池飲之以洞視金膏服
之而冥搜不然者良不能以久留也粵昔
子晉韜精帝京弄參差於緱山搏扶搖以
遐臨瓊臺儼其龜負雙闕屹乎龍躡正右
彌以贊化千齡髣乎氤氳故茲山也四面
削成中心如掌真風合於冥廓梵炁通乎

盼蠻三井之泉千尺之潭臯羽警其灑露
髯羊匿於陰嵐飛梁凝冰側足涉褰翠藤
流霜觸纓捫緣梭溪交流以織文忽蟠竦
之鈎連望飛瀑之懸絕日五色而成妍夫
樂與餌過客所止夸誕逐魂踐形者耻長
生之藥眇茫於神山執期之候談譎於五
利却衰疏頑簡易理得其亦有所益乎菌
蠢春秀篔簹冬萌五葉之松三脊之香丹
光騰於金鼎冰泉徹於銅罌服食之而不
墜身輕忽焉以復丁企列僊之遺踪葛翁

策名於太極斗晶熒於樞紐金光雜流於
瑶席納雷谷之砰磕窮幽洲之罔象丹鳳
昔焉以來儀凡羽厥今以避讓諒守貞以
制氣匪狡獪以增誑法不孤立道不虛行
繼之者白雲先生受素書於軒轅襲帝胄
於典午愔寡言而無營思坐忘以遐舉承
唐皇之明問敷清淨之舊章署漆書于寶
幢迎黃雲於玉堂厥後憲章希夷範圍靈
寶誦藥珠之玄文過期頤以終考若是者
誠何異於蓬島或有言曰樓臺榮觀方士

侈崇夷考是山不綺而豐不幽而通廓兮
其有容閔兮其訖逢味興公之挾竒訊擇
木之寫真若增其歛峯盡其窈深身不羽
而凌邈俄曾城以瑤林迺若丹霞伏光鐵
柯舒英集衆妙以凝睇髣三真之傳經擬
金剛於鐵磨警黑業於鴻鐘何錢李之二
王莫能悟其祿終猿抱子以望月肅伏威
而調風靈瑛清以集鸞哀弦急而驚鴻爰
自有而即無眇壹氣之鴻濛悼南國之蒸
歌騁天都之肅冽彼夏蟲與火鼠徒自煎

清容居士集卷一

以內熱申之以辭曰

帝子下兮雲中質通明兮粹冲覽炎洲兮
垢紛節容與兮茲峰蓬瀛杳兮無極浪滔
天兮不可以履境荒滅兮安益曰此留兮
吾將以內息神為尻兮氣為輿朝紫霞兮
暮清都黜視聽兮道靡渝歷千劫兮復故
初雲凝素兮中壇鈴沆露兮日暎三灾屏
兮嘉祉繁語夫世人兮歸休乎靜觀

椿堂賦

為宜春彭有
年道士作

昔嘗疑夫漆園之叟學幻而逃虛詢蟲魚

之疏考風土之書莫之敢圖余游上京
有客北窮夫金山西歷夫賀蘭南踰離題
東超三韓鞞然而言芒芒禹跡子所履者
誠然乎冬裘夏葛寒暑之運環也今也日
臨中街霜飛冰霾毳集於踵貂挾於懷戴
斗接浙承露凝梧子安視而靡猜駭聞忽
見知奚窮乎齊諧吾先放夫九州者而言
之屢熟之稻南州是專十丈之蓮華峰所
傳括化石以錫貢樟生庭而為州梅梁分
以鎮妖祥犴鞞乎維舟祀犬吠而質變獲

人形以劑投華平雒常瑞於皇圖奠莖屈
軼盛於堯世木沆產子以成國樹古眩精
而為魅松分秦王之封柏擅蜀相之祠若
是則復何疑焉在昔

大帝窮源崑崙見北溟之鵬視之若雪即
之如雲得其遺羽文尋不能以論是齊物
者非寓言也耶維老壺之遺裔握六氣以
自馴鞞茲齋居其名為椿二儀絀縕周流
無垠則以自儀道合至淳吸兮若韞旋兮
若輪肅兮似秋熙兮如春行乎六合而不

蹟則所謂八千者吾猶以為歲年之稊米也客揖而去遂為之賦

仁壽堂賦

合江老人杜 年八十有二其鄉人尊之以仁壽目名其堂于輝卿今為蜀省掾來 京師求賦賦曰

合江老人生於三卯歲之中秀眉疎明鮎背隱隆家事勅斷遺聞春容口欲宣而彌哽情屢發而莫逢會稽生揖而進曰生居東南艱輕飯甘耳不屬於鉦鼓目不接於

清容居士集卷一

九

戈鏃合江之事相傳於游談顛削續書槩俛鴻筆以有參老人改容正襟往侶可尋夢若初覺病猶在身方其誓師斗城滅親割情盟重於白馬命輕於浮塵黃風颺沙千戍屏營擁若波湧排若筭經危堞隳而礮激關戟護而矢承壁者瞽者各有攸職熏室旁穴旦不遑夕壞館門毀甃石樹列對峙填負旁院卓飛泉於雲根起清流之千尺目不能承睫氣不得納息黑祲障空燐煙蔽江橫厲排蕩扶擊春撞擬效順思

投降提獎之主怒莫敢當忽風歛而川止
活驗喁於鼎湯噫嘻吁此其瑣譎者耳華
陽之往蜀鞏於文翁志於太冲纖侈日滋
繇是鑠景福盪醇風鬼嘯高居神泣巨峰
棧閣如砥萬騎突馳火連摩圍氛翳峨眉
築京觀以專戮甚稟街之陳尸順舟而下
者十不得一緣澗歷塹視京垓之豪釐崎
嶇古渝前彭後余保衣冠之弱緒猶興文
以舒徐逮夫六合會同彈丸震驚發渙號
以澡雪緝政俗以治平則夫兩州之士民
無遺鏃之害歌

帝德以底寧會稽生

仰而愀俯而笑在易之象復存於碩果物
極者斯通盛過者斯禍維今老人熙熙其
天休休其心事至不忮智藏惟深式是表
儀化而恬滛國有耄叟鄉有善人仁壽錫
名爰則其淳感古樂今茲其為擊壤之堯
民

樂水圖賦

東坡先生脫遠游之履衣紫絲之衣與黃
冠師跪坐息機臨清泠之淵懋巨槪之陰

意消言忘其得在心飛泉琮瑋寒源杳深
悲塵寰之隘險抱竒璞而莫陳將以善夫
濟世之極樂至理以自新維茲水之無倪
非智者莫能以鑒彼河伯之好夸終望洋
而浩嘆翳西海之沈羽竟其說以恠誕小
大不同其病則通駭於所聞者忽所見誠
哀乎舉世之盲聾余嘗披神禹之地圖考
先生之轍迹而誦之方其發軔于瞿塘千
里一瀉鑿燕安之醜媒悟孤孽之非禍雖
盛氣之飄忽已足窮物理之化迨其中年

倦趨兮符東上慨河流之奔駛城不沒者
三板先生胼胝以先激而返之有以遏其
性之狂悍伊文登之貝宮空百幻以自獻
實精誠之冥通異燃犀之獲譴至於群妖
肆憎百懾相乘先生怡然而行試正命於
巨浸儼安流之無驚耿耿明夜乘桴南歸
海若息波馮夷效竒混六鑿於一噫信天
地之不私匪深於水者其能若斯耶玩王
孫之游藝弄五采於素絲聽之而無聲即
之而若遺若然者欲以求先生之所樂無

異畫餅之充飢

餘閒齋賦

曷不觀夫農父之治田春耕夏耘晝作夜
緝望歲常有思憫苗若不及候其陰晴謹
其涼熱食不滿噍目不承睫禱事告成以
祀以享入此室處曰余將有養休其四肢
里閭熙熙甕牖迎陽茲其為一歲之隙得
以自怡者與古之志士範圍天地之初冥
搜密籌心如淵珠掇會以集要積神以合
虛冬爐夏葛謝而弗居逮其蓄極以通若

燭計龜卜物莫能沮燕居申申欲不踰矩
倚門而歌聲裂金石恢乎其有容順化而
有得蓋其勤者若此則其終也迺以豫佚
惟昔賢之肥遯屹乎其頽波青林扶踈擢
茲瓊柯味道以觀澹乎不頗閱世推移飲
茲無何養其粹精不激不阿有客仰止撫
其嘉名以處以息慨然而言曰悲濁垢之
駢臻御吾輪兮烏窮愍逐日以道死異惜
陰之度功厥今金馬公車履舄接踵承色
以求為疲為冗退食以休濯其靈根藏真

養恬疏清滌祥庸式庸侶著于門顏維四
民之有制實士農之居先惰于初者躋于
後弊于智者罹于艱歸休乎君授琴而歌
曰群動兮夜息貿貿兮吾徒曷獨恣不能
以自適書兮在庋單兮在席復吾初兮以
無忒

息齋賦

慨太素之日凋服仁義者亦幾乎外馳百
幻眩晃衆愛糾縻側身於積薪之上試命
於累卵之危髮盡化而齒將終竟不得要

清齋集卷一

一三

領以自持端木之智工於言結駟之德色
索其中誠餒然也史遷之足老於行悲憤
之書不能以全其生也東門之悔華亭之
悲是猶碎轂而大輻掘泉而止渴何其遲
也古之至人止於其所不止休於其所不
休兢兢惕惕不得而名之強名曰息夫息
形者神清息事者愚絕息心者心愈馳息
名者名愈徹莊周之息影為荒唐陶潛之
息交為慨慷是皆未得其當若然者其必
有自息之方夫知古而不知今謂之陸沉

世故之岐多人事之機深生乎下都号又
安能超舉以絕塵維李侯之靜好藹鄒魯
之淳風不求異乎人默息以底于鴻濛振
纓而趨簿領如棼上下雜糅否咸混淪一
息而求之何異解牛之芒刃眇目於臺分
也退居申申圖書領賓不喜不愠寂然含
珍吾有以知其息之外陳者矣夫天地之
理動靜濟焉偏一而用則為五行之沴人
身之氣如車軸窒而不流則為疾癘為末
廢若侯者其何以為息之體而余以為外
陳者豈侯之意歟他年成功而歸晞髮於
彭成洗耳於箕穎味乾健之旨以極君子
之理吾不知侯之所謂息者其信然耶其
寓言耶

凝雲石賦

為張希孟作

文登之宮積濤成雪天風蕩摩海氣幻滅
嶽崙蜿蜒堅若金鐵大者成巖小者成穴
蜂房群綴蟻曲百結爰有張子扶竒護珍
藉以文錦炷以古熏陋博山之侈靡鬢爐
峰之氤氲湛然塵消蹻為凝雲有容哆而

笑曰南山朝躋奮搏無垠太素為母五嶽
為賓合虛成形積潤以神今子友一拳於
几席雲何自而凝哉張子倚梧而言曰宥
尋丈者不能以喻大語荒忽者適足以資
恠人惟至靈品物是賴明而通之呼吸萬
籟決為奔騰興為靈靈其來無趾其去莫
闕唯古至人韞玉以匱藏明于幽養神于
獨內澄外觀嗒若槁木靜以自儀無喪無
辱念此石友其德不瀆燕居相忘庸以熏
沐則夫所謂凝雲者不待於外而自足也
客喜而悟遂為之賦

紅梅賦

閑閑羽仙朝歸絳都冰渟雪峙湛焉澄居
候寒圭之微影察衆芳之榮枯草藏莢而
永閔木脫葉以無徒彼陰陽之眇密曷能
返乎玄虛於是天迴景溫機快候促吉雲
豐融美虹纒屬睽炎洲之嘉植泐乎其忍
此垢觸也儼藥珠之揚靈貯初服於太素
沐九芒之粹精蟠翠氣以內護頰容耿以
自持兮抱冲密而莫吐衣赤霜之羽袍曳

文錦之靈佩棄明月之寒璫綴飛瓊以為
璠匪徇色以自誇表昭質之莫昧凜世至
之如焚葩微愠以卻背惟深根固蒂之不
可恃兮將求化以養晦繫煒燁之滑稽懼
夫惡朱者之見毀鵠日浴以齧離鶴舞丹
而希壽念形色之莫踐徒變幻以眩售萬
籟凝寂穆然長思絢此的礫申之以辭辭
曰貌充心明道之腴兮葆光采貞慎德樞
兮渥丹自持惟受初兮不爍不騰莫可渝
兮時至神完吾其敷兮吾其敷兮物莫與
俱兮

九華臺賦

混元之峰鬱為仙閭霏青駭紅嶽峯相扶
下垂清溪百流是趨昔有羽士恍兮承跼
縞衣玄裳其化莫追爰有堯年之叟植杖
戒鉏顧瞻童土式崇墳壚黜幽導竒以薙
以除層臺演觀積成為邪拾級以升家林
滿圖迺擢孤芳絜泉廣疏錫名九華葆茲
清腴有客蒞止披情徐吁曰登高能賦大
夫之職也為我賦諸客曰皦皦廩秋天風

奏竽哀鴻赴空寒蟬抱梧脫者如掃縮者
如枯落妍歛英還形太虛存莫可禦去莫
可居相彼九華孰為有渝含章金衡承元
坤輿弗媚弗私苦心秉愉迴黃抱素包寒
紛敷飛霜溢露言沾其濡獨立養完孰云
彼汙世服佼靚飾脂效姝嗜腥豢醇澁甘
芼萸維爾茹口哆焉如荼耿持空榛曷知
我蕪叟曰好不可一鳴鴉螂蛆鈎以為直
石以為琚變奪五采睢睢盱盱已或自售
適增詆誣寄懷於言觴至不餘九九默操

嗒然蘧廬我生之辰天清景舒庸采以脩
庶其遂初山空無塵白雲在裾歸與歸與
吾以子為徒與

墨竹賦

屹書林之邃清襲空翠以膏沐察群芳之
交妍糗紫芝而不肉化蒼煙於寸穎皦森
束其寒玉有客叩門指而言曰天天申申
吾不知其親悃悃款款吾不知其怨懼獨
立之絜矜徒三刑以自獻爰有童子擁篲
以前曰東南之美以植則繁大盡斲採小

為烹煎曷扶其清孰庥其生零西摧東山
崩谷鳴取億及秭莫知可名維我先生念
茲磅礴探玄窟之太和布靈根於眇邈取
方諸於承露和不死之至藥寄遺跡於須
臾避玄冥之饗虛故其凌風出塵廓兮如
神承春飲鮮從兮如雲疾掃却顧猶歐冶
之鑄郢人之斤也且客獨不觀夫鑑之與
形媼妍脩纖各窮其精惟靜者能以燭至
動而所謂談譎變幻迺足以覈萬物之情
望南山之崔嵬目九日而不瞬匪好夸以

清容居士集卷二

二

眩竒良以解夫謏聞者之愠語未具先生
振衣坐忘與客相顧卷繾以酬一笑而去

素軒賦

太原白無咎徵名字于易復以素名軒實
維其祥乞賦陳郡袁桷賦曰

維太初之混茫兮眇昭質其孰分二儀迭
其交媾兮肇清濁而成文翕九垓其同風
兮佩鉤矩以播芬邈焉黃唐之仁聲兮極
黼黻以成憲忠與質其相環兮迄蒼姬而
莫變亘終古之同軌兮成後來者之過眩

微載籍於竹簡兮淳風鬱然以未墜憫太
和之淪胥兮希絜己以自致三熏沐而揚
靈兮儼前聖之遺旨悟宣尼之自筮兮繇
告之以不樂曰丹漆不文兮白玉不琢質
不可以受飾兮道不可以雜敦厚靜止兮
弗居其華惟無色而自色兮物莫能與之
加爰錫名以表厲兮雖顛越其靡它凜世
垢之渙忍兮蘄旁證以冀直聃演言以清
淨兮戒目盲於五色墨諄諄以兼愛兮悲
禁如其何益冕朱裏而外玄兮袞襲裘而

不謁淡玄酒之無和兮輅盡誠而越席顏
執仁以不違兮炯虛室之內煥商舉隅而
起予兮懼絜矜夫倩盼噫童子之微言兮
警曾氏之華睨捨沐浴以孤泣兮地有知
夫孝子乘結駟以夸容兮終內熱而殞愧
車美澤而可鑑兮曷栖栖夫靡止彼馬師
之食藝兮亦能遺玄黃而洞理羌若人之
好脩兮妬芳澤之日恣將乘飛廉以上征
兮揚古帝之正則悃悃歎歎而彌貞兮固
丹府之介特書盥盂以參倚兮憲夫龜之

不食揭嘉名于戶冊兮振白首以莫忒申
以辭曰茫茫重玄物之先兮剛柔相摩文
以宣兮反初復真德迺全兮履素莫渝吾
將以無愆兮

冬窩賦

濟南潘仲德家商河治其田廬塊土累石
以處左經右子刻意厲行斟酌度古昔將力
避世不復近歲終順陰陽之理慎居于中
而名曰冬窩未幾聞于朝為太史屬太
史職清簡仲德獨憂之復以昔日命名者
揭以自警余聞異之為之賦曰

噫嘻夫世之善養名者豈惟冬與朝而興
夕而趨執轡在手承塵滿裾僕夫告病寒
冰厲鬚剝飛英於窶數巧膏沐而睢盱懼
分忽之不前戒良哀以先驅矜清揚之婉
婉猶春溫而于于何自而冬乎大盜之智
不以胠篋巧賈之利不以操割蓋將足不
超闕而踵接其席目不承色而議推其德
美容峩峩雅言迤迤爰處爰居載笑載歌
閱無傳之靚邃又何為乎冬窩也哉潘子

曰不然冬為天終萬物蓋藏陽微如芒外
枯內傷甲者若縮伏者若若亡裂者為阱凝
者為防歛吸以吹浩漾莫當口含飛霜睫
承流漿三光青熒五嶽仆僵故其蟄處也
隆然以龜深息而卑卑其徐行也蹙然據
危俛僂而施施疏房上宮連氛累靄嶽峯
阻深束縵以載鑿坏者遁煬竈者遜當此
之時食不飽菽藿衣不襲裘鞞悻悻然角
進而憑陵將弗折而自缺且夫藏明養陽
必謹其獨大智若辱大容若谷紛載籍之
蘊祕糅衆說之桎梏折精華以彌縫豐蔀
屋之光燭吾非以堪岩為居鹿豕為娛友
幽闐而棄斯徒也念居蠖之未伸凜自縮
而不惴謹清寧以冲齋御六氣之寇沴將
以游乎萬物之初順四時而成歲也

榕軒賦

南粵之區溫風戛摩積炎吹雲流金為波
少負老息眄茲庭柯爰有弱木攀緣嘉生
連理纏結附枝膏凝蔭旋萬牛廣容專城
千柱承宇百尋傲空群鳥莫爭希賢同風

長與少殊如昂如顛溜微生於一髮寄豐
壤而敷茸詎擁腫以丐全眇頽波之容容
廠類滋夥其名曰榕東魯先生見而笑之
曰目無常形嫫母以為能耳無常聲折楊
以為清美醜相乘孰完其生眷茲連螻棄
諸同辭薪者鄙之斲者訾之輪者絕之器
者揮之夫好惡不齊莫與之爭吾何行焉
舉觴以噫噫極而歌歌曰木之詵詵匪委
佗兮木之萋萋匪婆娑兮巧為彼矢名為
彼戈徂徠維松新甫維柏柰何柰何客有
踵門而言曰議物產者必以良舍所用而
求無用將安所嚮先生曰多謀者神泣多
才者形傷維彼阻窮百慮備嘗蔚然以修
充然以光四海立賢勿云其方窮髮之比
殆將駭兮榕兮榕兮吾以為楷兮

復庵賦

為恒山李
謙父作

揚子之衝千流交趨蔽帆雲凝炙轂雷震
塵奔瓦聯擁關蹋衢土衍隰勻深耒廣畬
百技眩衰千賈獻姝爰有倦游之叟卜龜
食吉構茲磨廡不斷不甍茹玉芝而三咽

膏玄髮以若漆與客瞰空觴而言曰今夫
所謂歸老者其名鮮鮮其行暖暖脫機於
韓盧之吻息影于菟裘之巔造者絕履奉
者謝饋嘗仰屋以嘆感極以悻悻極而悔
黯崦嵫之吳離揚滄浪而莫贖若是者吾
奚以為歸世有習靜之士逃聲於無形避
害於有名山鬼獨嘯悲猿凌兢掩耳疾匿
脫鳥如驚是鳥知天地之性哉磅礴之理
不能以獨運慄者舒者疾者徐者足以窮
萬物之真維昔此邦犬牙東南前江右山

朝煙夕嵐憑高而望則去者如箭淨者如
練杳者如線效者如獻日出而作連崗燒
空交蘆舞風土臺崔嵬野田豐茸昔之荒
煙萋草恍不知其處所寄遺蹤於白鳥問
秋風於賓鴻夫觀萬不同恒維其機今吾
乞身於未老寄此土而食於斯也素書滿
牀白酒在卮鄰熙社恬子順孫祇不脂不
韋不激不靡視昔歸全而索隱者相去幾
希靜者動之根息于外者其內若焚川流
徂東龍返為雲日沉于淵朝升為暎其本

元元其生芸芸簡兮廬乎覲無渝乎又何
懷乎土乎

擬剡亭賦

為吳成
季作

英英維祥織流成章雙峯嶽崑紫芝熒煌
峙立澄冰玄言飛霜爰有化鶴之叟迅翻
珎館舒風盤霄歸而歌曰茲山兮沃膏陽
霏兮夕濤吾還兮不崇朝將何為乎逍遙
昔之命駕者興極而意已盡卧游膏肓者
不千里而接軫去若隙駛留若柯寄情不
及親豈我輩之謂耶彼櫟輪囷爰衍爰溉

清容居士集卷一

二四

彼桂扶疎以嗣以賚養苗者濯其嘉牧羊
者去其害植楹兮鼇負布甍兮鱗雅我季
兮圍圉孫並曾兮陳廡蹇獨余兮不留目
凝睇兮屢顧芳菲菲兮在林誓將築兮奉
所欽卜龜兮于庭誦言兮揚靈彼簪兮奚
投返真兮思冥學道者天完逸老者齡延
順以養榮息以固形刻意枯槁者吾猶謂
之善盜而我之髣象豈果有所羨而自表
者耶道本於無名擬之而變成鉤深者泉
如珠在淵遇風為漪激流為川彼剡伊何

源遠不遷則而企之於亘斯年

餘軒賦

為程士安作

世有好名之士佩玉長裾鳴騶導衢侯者接踵對者奉諛日三接而色喜坂九折而懷吁欠伸委蛇顧而子孫且言曰夷考昔人吾何能擬哉棖楹闢空旌旄樹霄部曲中街膏壤近郊悵兮屏營慨兮鬱陶若是者何囂囂也爰有靜士卑然素儒載尻為輿游物之初粟不滿缶屢空泊如爰笑爰處擬諸華腴昔東方生見戲于侏儒翫世

清容居士集卷一

十一

味道忘身之蘧廬維程子客于江之南幾四十年幻者如飄風逝者如回淵禍生於公餗罪成於細旃撫心以思孰省其愆徃游于其軒太古為春無懷為年探圖宓戲受歷軒轅在易大畜剛止以育德日新而自足者也昔之至人道充以為富聲出金石柳生其肘席不蔽坐飯不充糗今子之居酒時滿筭蔬時滿把視昔之窶者溢且夥矣程子憮然曰吾誠夸矣

隱居圖賦

陳子築居唐奧之山復繪隱居圖撫其其
水某丘之雅名署於其旁以寓朝夕不忘
之意每遇佳客輒指以示若挽而使之游
從於其間也間謂袁桷曰夫畫以髣境畫
之所不能及者吾雖知之而不能數與人
言之且境必有趣趣之精華非言不傳也
子其為我撫名以發其趣桷對不敢辭迺
為之賦曰

陳子倦游江湖整轅言旋顧瞻先廬徜徉
里門四壁寒寂頽然維藩詢闐闐之遺跡

儼中堂之猶存弔零落之舊叟撫徬徨之
驚魂於是悲極而喜喜極復悟悟而言曰
人生一世惟靜者智盛不可持翫不可恃
三家之市其行跂跂四達之衢其言姝姝
一以巧為媒一以醜為居吾懼其獨立而
誰與趨拂龜以占兆於唐山之隅若質而
華若翳而明缺者如玦環者如城相其陰
陽築室繩繩被以杉松瀦以芡菱棄塵世
之喧啾庸乾坤之清明爰命雅客展以輕
冰之楮化以五采之穎纖濃如春曲直若

領吐秀獻竒發續炯炯鄰輞川之清妍敵
草堂之幽靚故雖踰江越嶠適市造朝挹
此繁者神凝各消有不待北山之移八公
之招也客有言者曰擁裘而歌者意率類
於慨慷登高而賦者事常失於荒唐吾敢
按夫子之圖而代言其詳東越之區山水
冠世發抉地靈前王後謝維君之居敞若
神界若廼石塘界其前雷峰守其要馬領
冠其巔羊巖負其奧周以青鮮橫以磊砢
近若迎笑遠若却坐嶽嘗何山挾輶以殿

浮游閬峰振弁以見上有石屋梁欂參屬
紛披寒苔聯絡恠木恍飛仙之遺跡鑿幽
竇以守獨前林杳靄丹光騰天伯陽一去
而不返玄鶴盤空而將還飲石室之寒露
問山人之何年然此特隱居之外美析而
舉之有不可勝言者矣晴原漲春千樾爛
雲飛英滿溪織流成文支寒藤之瘦骨度
略徇之微險解瓢斟泉一舉三咽藹桑麻
之故交爭聚首而繾綣前有惠林濃綠姍
娜投冠解襟脩然清夏欣衆葉之敷陰訝

楞梅之吐火秋畦離離黃菊爛斑爰泛黍
酒駐茲頽頽懷千古之處士酹悠然之南
山歲窮境空長木號風寒岑晃曜歸然中
峰渟膏溢銀噴如飛龍匯為澄潭窮髮鑿
容烹以碧玉之鼎瀹以雲腴之茗神清意
寒語爽心冷蓋將忘塵世之事而深以內
省也相彼雙門囿茲群山清風常來客去
不關圖書自娛鄰社莫干有堂寬闊扁茲
嘉名悼白雲之何往悲先友之日零瓊樓
舞空清曉萬變默坐以觀翕忽詭幻賓天

衢之出日駭青紅之紛眩鳥衝煙而避枝
兔驚林而絕坂嶺濛濛而人度露溽溽而
葉顫念哀鴻之相求時遺我以好音緣小
墅之橫岡花竹儼其成陰悵舉世之莫從
歌風雨之苦吟迺歌曰歲將晏兮莫留過
故居兮懷憂山坡陀兮四屬吾拮据兮以
屋懼世德之顛隕兮習肥遯以蓋穀駕余
騾兮屏營耕石田兮腹果究出處之何心
兮幸余髮之未化為我語山中之人兮吾
將歸老于其下

清容居士集卷第一

[Faded bleed-through text from the reverse side of the page, appearing as ghostly characters across the main text area.]

清容居士集卷第一

三九

清容居士集卷第二

騷辭附

愍誓哀謝先生

受穆清之元陽兮一精白以抗修閭闔睽
睽其初麗兮執正辭以告猷黯朱光而不
燭兮妖群立以縱恣飾詩禮以逞誣兮曰
余將焉所詣曾臆結約而莫達兮史告之
以寡言心屏營以靡置兮導旌旆而為之
先揭德華之魁壘兮勵來者之不前一成
旅以興邦兮佗然莫余敢擬州纍纍以十

清容居士集卷二

一

百兮夫何寬衣而廣袂燃積薪以逞安兮
群豢食而自戲竭精液復疾呼兮卒莫能
進其詞振飄風於林籟兮葉脫故而懷新
衆喁喁以雜居兮蹇獨立而號呻矣危忱
於帝闈兮星委地以如珮何執愚之慎矜
兮守隘說於顛沛持空薄之一髮兮振千
鈞於層冰力弗勝而殆兮猶夸夫守道之
經企女紀之傾輪兮極迅翼以恣徃九疑
靈妃慘玉容兮鏗鼓瑟其音蕩重華倏焉
以冥邈兮凜舊德之日喪乘桴游於中流

兮海若息波以竚望棹夷猶而靡行兮羌
何為乎此路砉然揚靈窮晦冥兮朱鬣乘
旗挾以震怒澎湃蕩歟激回渦兮爰深逝
以款歔懷縮慙而失援兮寧忍歸夫故居
死無能終報兮生莫知其曷圖貴化人之
冲漠兮絜肥遯以自遜蒙垢紛為汙濁兮
薄日月之吐吞整門竇於荒滅兮屏精明
以黜聞超飛霞而上征兮遇武夷之神君
逝者翳于山丘兮夸誕逐其營魂覽三聖
之古簡兮宣尼實為之彌縫謂道無古今

兮孰與之傳虛九九而內明兮剛柔錯焉
以敷宣翫朝步之竒文兮握竒五以黜煩
建中極而滅端兮成品物之自然湛然一
以貫兮曷知其後先數京垓以成變兮迎
拒之而莫偏歟莫知其跡兮為道之全夫
形既不可以久擅兮神與之為橐籥迫朝
逐而日騁兮引正命以自絕棘彘彘于車
道兮精離榦以蕭屑秋陰憐其婁骨兮熠
螢光之明滅手三秀而不忍茹兮腹殷殷
其雷裂奄兮愀兮忽以放逸兮何昭昭其

章微 亂曰玄神凌兢兮命壽不得長闡
茸曼衍兮既樂且康衆皆馴帖兮靈胡然
而秉方擷雲英兮微光佩雜芳兮彌章駕
赤鯨兮騰驤絕六虛兮放八荒注北斗為
漿兮內熱不敢嘗林有桂蘭兮水有鱣魴
所思弗見兮奚故鄉挈眇風兮樂未央吁
嗟逆化兮寧怛傷

廣招

深寧先生乘虬上征江海殄瘁湘纍遺痛
千載猶一日也柳車爰行瞻望永隔門人

清容居士集卷二

二

袁桷竊取宋玉招魂述廣招以反其義其
詞曰

竊獨悲此翳濁兮身鞠忍而莫明服三后
之貞則兮秉忠純以內兢繩古義以自抗
兮懍微躬之莫勝懼天命之不吾與兮晚
更蹠以深寧委靈魄於玄宅兮挾清神以
上征重華慘其無容兮矚下矩之險隘侈
九夷之曠邈兮申前聖之遺戒一去而莫
返兮八靈孰能以震駭乃命小臣戴繼秉
旄注精高冥而下招曰茫茫封丘腐豕萃

只炳靈奔飛杳交會只嬋媯清芬孰返旆
只縱橫幽房雜厖恠只魂兮歸來其益以
駭只東門熒煌平蕪層陰只靈宮紫芝萎
以泯只流鈴搖空訴李淫只玄蛇蒼鼠若
擾馴只魂兮歸來激越吟只題變蹂躪白
蟬飛只滅方鑿迂傳致以肥只闢青綴白
眩纖竒只折楊黃華司體儀只魂兮歸來
彼相疑只沃隰修畛鞠薺茂只狂夫冶游
胡憺後只南山白石曷以永年只式擷其
徽悵周原只歸來歸來其孰能庶魂只愁

雲旋宇陰籟振幕只素空霏塵清晝激電
只虎雖黃目屏陳設只精鑿後置爨蟲施
張只伊嗚仰天雜猖狂只甘腥恣睢禮不
可防只魂兮歸來悉無以當只魂兮乘桴
登瀛壖只海觀日浴爛紅殿只哲容長裾
襲古先只漆書竹簡遂研鑽只崑崙穹隆
疑有至人只妙顏紫蕤休德日新只吐珍
納和與道為鄰只雕題祝髮禮讓興仁只
桂蠹咀吞味芳辛只幽蘅嘉芷佩孔文只
相羊湘纍罔若存只承挹清塵徘徊翩翩

只天光淳耀會弁森扈只肅容展威受多
祐只斬凡破觚斯皇輔只龍圖昭回布高
矩只開陰蔽陽庶類蕃嘉只捫歷箕尾建
崇牙只翦理姦巫靜無譁只炤示下土循
義媧只河公海神瑰以迅只貝宮鮫室祕
恠雜孕只瓊英琪柯錯繽紛只鞭龍誅蛟
需澤湛潤只魂兮遠游戢凌素只揚歌舒
嘯化幽憤只重曰嗟所思之不得見兮儼
冰雪之遺容緊遲遲而容與兮松柏日其
蔥蘢悵幢帷之咫尺兮長虬脫焉以追風
蛻塵居之險艱兮捨崇蘭之新封墳麓迭
其和奏兮聯雲車以陪乘粲琳琅之遺編
兮俾泯絕之足證匪離群以自絜兮誠不
忍夫騫騁超整駕以言從兮懼見譏乎後
聖揖虛漠而言旋兮耕書田以振厲諒神
明不吾欺兮庶終承乎嘉惠千秋兮靡長
白雲兮相望魂兮歸來其母我忘也

七觀

翰林先生納榮息機謝白玉之堂將歸于
麻源之山房越公孫懷贖濡穎託物喻志

考圖審曲若鑑之納視言忘而意消類別
而理備有郢大夫癯然褐衣目不接乎黼
黻耳無聞於律呂鞞而言曰登高能賦淫
曩荒忽智專者魂強形滯者物逐昔吳州
來觀詩東魯言有度徵有據厲階於枚生
濫觴於曹王先生楚產也雲夢汗漫巫峽
噴岍曾藏腹蟠公孫不足以教我先生殺
青南山積簡羽陵若網有網若墨有繩舉
凡暢微我其聆諸

越公孫曰太素烟煴清濁莫儀雨風露雷

清谷子集卷二

六

動植攸孳辨方審良民用不疵六氣以沴
曰天其世彼諄諄者皇曰汝命實長朕土
燥剛相其溫涼我生命在天順以受年巖
居谷飲中道以隕執書以觀有涕汎瀾陋
彭鏗之逆理兮何恣縱而益顏言技可以
進道兮吾當繇是以返觀納腸補藏懔忍
莫竟石立土踊孳孳迂逆吾猶以為天地
之病也脩身俟命道之大經先生之正也
大夫曰神之所行何體何方拘者為儒請
更端以告僕夫

越公孫曰靈曜宣精五紀順明察幽考微
法天以行形氣芸芸吉凶卑高觀象以分
韜兮靈根感不以言繇動彰靜百神受祐
虛者為音質者為數昔后稷氏之職黍稷
蕪蕪智者過謀胡盡其地力民日作慝相
攸食墨風雨斯蔽連雲岌業飛不得垂喙
履不敢仰視旁營萬家地記萌牙赭衣債
蹶而淮水復絕鑄鼎伏姦能沈于淵吁嗟
而求桑林之羞要荒擾馴王會盈庭獻琛
效珍物不可枚陳雞豚以時父恬孫嬉何

清容居士集卷二

二

助邊蔑思屈曲洲島家累千金資先生昔
居列僊之館據要集思謂象以理明妖由
人興守諄芒法清寧却走馬于郊謝重譯
之雉陋三脊之茅熙熙陶陶舒舒天天不
言而歲成無營而事貞夫子不云乎一致
而百慮其是之謂乎郢大夫曰汎觀博聞
於道彌損顛滌耳以扶其蘊

越公孫曰粵昔居父唯俎豆是敷擊刺坐
作曰民以教蒐苗獮狩車徒卒究厥今輿
圖八表同曆四貉交軌月竈風丘冰天桂

海馳心望雲請命款塞千廬呈環八屯山
列羽林緡經飛騎鼓笈然而樂成者難與
圖事守文者不足語智嘗聞之兵農同封
耕戰同功魚鱗鴈行敵莫我敢當府散籍
移萬姓流離強帥拉脅外寇憊肌卒不可
拄支後王鑒觀法日以繁厖者罷者惟者
羸者駢頭引吃食粟而嬉開門納兵百郡
是師何草廬高吟崎嶇雜耕何杜氏之子
傳瘳孔深而緩帶以征射以容觀劔以氣
言批亢擣虛孰知其隅折衝厭難莫窮其

畔至若握玄圖視龜文縱橫起止與易象
相表裏者驟語之吾懼大夫之竦昭也大
夫曰兵者不祥之器未效此知也

越公孫曰炳靈心君闢乾闔坤情聲相宣
立度出均昭昭鴻藻紉縹是存敢先論楚
材而言之謬謬乎形畏垢而將翦也霏霏
乎睫承露而欲訴也荒蹊斷葦燐滅沒而
疑聚也織文揚徽攬芳菲而雜組也少焉
商飈號鳴金石琮琤逐虜搏兕鞬鷗鏃鷹
寄莽蒼於一瞬乘扶搖以孤征終緩轡以

就日愴倏淪乎西傾噫悲何為哉古有巖
居之士抱竒挾幽漱芳深林憩寂凍沅愔
乎其若遺窈兮其若留鉤盤眩之為回旋
虛牝答之為獻酬猿三疊而墮淡鶴九轉
而凝愁鉤玄採微迄無終窮瑤席敷張高
歌慨慷語初麗而終放託餘韻於宮商然
此其戔戔者耳攬拾蒼雅刮磨詰盤微繁
貝編飛英露溥何譏乎肉食之鄙猶鄭穆
而魯桓也大夫不聞之乎鍾石絲竹各隨
其聽隆汙有時其所遭者命摩盪堪輿吸
呼羲娥矢為帝詞叶為賡歌五嶽贊襄百
靈護呵不棘不茨如砥如磨發潛漏泉掖
民陽春瑰逸為新簡絜為真列若戶居別
若渭分雍容者玳璜冲遠者英莖縷絕而
緒續醴甘而齋清昔之擅名偉著耿兮其
不能以十百程也浮聲切響直意肆志滂
泮訇溘泊滔莫止据理者夸飾言者哇嫫
毋兮姑射鉛刀兮鑊錙蹇莫任兮柰何大
夫曰文章與政通玉署之職也文勝質則
史更言其大者

越公孫曰矻矻中壘校讎靡寧世本年紀
繫于麟經捨相府圖書泯其緯經炳麟金
匱汜罔敢配廼司馬氏決榛鋤翳麗者為
譏激者為刺升涉世家表籍作紀言諸侯
無史史立周圮鄙儒畫塲削章刪凡燭火
並日卒漸盡莫傳昂昂荀彘辭約義完何
班范家至耿光綿繇相繼擬述百世一律
素王簡編如日在天熒煌高張孰敢附肩
鴻化以瀉研探益疲穢者闡者覈者濫者
澆忍畏禍希企市價諂不表直俚不師雅

若聾鼓鍾若盲策馬元經附訛唐曆受呵
後有紀略迄莫同科尹石猛志證古比事
百不一試歐陽氏出方名山所藏復大同
而小異勢不兩立其魯史之謂厥今繫謀
川盈記註櫛比故志存廢興之源典章酌
損益之致登瑤山而神駭游鄧林而日眯
般倭効吁隨和發涕操觚之士吾將見其
心赧而神悸也先生登祕丘覽群玉積石
倉標朱目墨兵筆削融液手粹精園赫胥
鄰大庭大夫宜從下風而乞靈也大夫曰

皇王惟熙帝霸孔熾我心增悲韓愈不為
史名以四馳何庸知焉

越公孫曰煌煌古帝別生聚方煥乎陶唐
五服正邦五典率常導之無違民用熙熙
授之以時聿來孜孜降于三王厥緒曰孳
集成于蒼姬黼黻憲章金石命令緝熙太
和宣昭群姓織鉅之備絜乎其有秩也豐
殺之制屹乎其有截也三光重輝百辟拱
列歲時易移而浸淫蘗芽弱者綴旒强者
鋌戈智者探囊勇者拔河搏犀象屠蛟鼉
飛矢請命旁午係車焱乎浮雲迅乎奔塵
炙轂滑稽之士紛然而並陳棄仁恩假鬼
神混君臣各馳騁而懷新數千百年人亡
而說具勞乎離婁不足以一視也蕭乎王
良不足以一御也其最大可病者恬泊守
真可以養身不可以治民絕性棄命黔首
蠢病孟軻氏有作吾見其髡鉗而舌咋也
言未既郢大夫曰天藏山中瑾瑜匿瑕問
以辨之厥德日華儒者詬病卒不能以勝
何道最高子盍陳之母激母勦

越公孫曰古昔顓童受業問塾書數首通
訓故是屬聲歌象舞目接身服相親有恒
日用不瀆後帝不相聚緣祀興文八音察
寥五禮紘紘鏗鏘莫明而聚訟若焚鄭說
乖誤後圖踵循象制益湮周官別出議者
欲一繁紊綜錯操網而入林適越而轅北
也類禮孔勤五厄莫存後有倣補去取未
就卒乘虬駮雲字以文合聲以音比旁行
敷落落離狄鞮文軌同風不能以一致孔
壁莫推二經蕃廡聲牙為今簡儷為古謂

道統是傳曷敢有語詩基文王而周召先
興首章異同衆說沸騰風雅變言美者為
訾直者為詆魯頌紀異秦誓告終何後學
曹曹迄莫之通麟麟魯經議口法吏謂齊
晉無褒而日月具刺紛若蠶蝟眇若糠粃
不虛其心不明厥視遺珠抱疑探篋積毀
然此特人文之經緯政治之用體也三聖
述作包河總洛二儀生於心萬化制乎神
迎之而莫親拒之而彌存疑者遜者愕者
困者湛兮消兮委兮昭兮沉思遺物形離

超兮激迴颺兮闐而寥兮縱雲翺兮憺兮
儒先從我招兮郢大夫曰始吾見公孫疲
欲若不足突梯若避辱靡精槁神何斷斷
然也今知子矣永譽處矣吾與翰林先生
徜徉此土小年大年猶以為朝暮也

楠不佞遺謀守儒埔東南故家志學之
歲先子命繕治書錄觀史志畧錄部
第時見舛雜稍長得博考先賢歲書總
目訖訖三十七年合傳短長迺成一
賦之遂作七觀極道源委延祐三年
在丙辰七月癸丑會稽袁楠誌

嶽麓圖辭二章

青容居二集卷二

三

嶽司南兮齊紫冥懋陽德兮炳靈二老兮
素綦握鴻濛兮矢詞百泉兮一谷釀為川
兮為瀆玉霏霏兮日光湛淵默兮含章至
言兮在圖同八方兮遂初重華逝兮不返
晝猿啼兮席當坂

望臺兮靡蕪蹇一士兮拮据百楹兮承宇
輦山瓢兮以為醕松風冷兮琅琅儼振佩
兮高岡朱羲出兮揚靈積陰伏兮大明百
泉飲兮在齒慄交流兮不可以止嗣德兮
孔艱清徵激兮回瀾

悠然閣辭

鄱之西兮峰圍圍席豹屹兮雄姿綬蜿蜒
兮紫屬旌馱駢兮虹垂之人兮槃阿畏羲
娥兮高駝築榮觀兮通明手參差兮以娛
棟隆兮示背榮翼兮聳喙鑑匯雪兮鄱之
區抃有七兮日輒採鞠兮黃裳緝萸兮紫
囊芳冥冥兮夕暉憺獨睇兮擬所思雲飛
英兮山之阜為予留兮不遐以處秉貞兮
神專觴彌劇兮益完山中之樂不可以久
遲予返兮悠然

清容居士集卷二

十四

楊堅州治孟津金堤成作金堤辭
波湯湯齧我堤民昏墊晝負攜地不寧緣
木棲楊侯之來承帝則順事陰氣神以懌
赤蛇蜿蜒吸桂漿百谷受令故瀆常彼隰
柔桑猗澤維杭侯言神綏曷敢功民言侯
績天心通百妖伏精金石宣明三旬有後
金堤是復

石田山房辭

大梁馬伯庸寓居光州作石田山房為作
辭曰

淮歛波兮練繒峰植秀兮翠旌翦黃榛兮
布耕石戔戔兮稜稜思夫人兮造攻雲電
合兮追鋒遺鏃兮齧足壤逸休兮果腹神
符一兮告祺藹惠則兮貽思靈之來兮歲
祠不鄙夷兮以嬉䟽房兮筍席溫風至兮
靚密儼竹素兮橫陳曰靜脩兮手澤世芬
兮日起百稔兮無斲石田兮有秋累胼胝
兮吾奚以愁謹樹藝以自勗兮植先德兮
無媮雖本兮穎豐導泉兮澮通夫豈不知
有善歲兮吾曷敢燕遨以幸逢望公公兮

巖巖王孫悄兮莫還積荒幻以自迷兮捨
息土而弗芟衆芳婉其披離兮秋霜慘不
能以實謝紫芝之療飢兮治精鑿以煉質
亂曰苗誥誥兮善吾耘兮日出作兮永裕
樂兮學猶殖兮吾將以為則兮

雪江圖辭

雲玄積兮素摩挽羲車兮馮河蘆戢戢兮
倒戈岡伏匿兮鶴鵝昭朗兮夕徹群動寂
兮影滅超逍遙兮一舸食穀精兮腹羸地
險兮曷憑馬飲波兮夜騰委素練兮宇清

舉皓首兮吾奚以屏營

垂綸亭辭為宋誠父作

漠滔滔兮日傾東滄浪兮泠泠寒一士兮
沈冥垂芒鉞兮不屑以魯明珥兮貝宮朱
蔚兮青葱魚戢鱗以為衛兮龍騰章以屏
氣謝娟嫫之嘗巧兮口垂沫以縱恣吾寧
養之以歲年兮寶祕鬱而不宣豈直鉤以
違衆兮守釣道之自然時至而迅舉兮匪
荒幻之詭誘保貞志以遂初兮考銘言于
耆叟世俗眇其莫同兮永訖依夫前聖之

所究

巨峰辭為吳成季作

千嶂兮嶽崮特峰挺兮絕垠泉交流兮織
父粲霄臺兮鱗鱗檜節兮松纛接路兮以
遨儼至人兮清寥休德新兮日昭神曾舉
兮重玄大帝儼兮授簡以宣曰渾沌其無
迹兮孰為之傳氣積兮九乾五緯從兮右
旋逆知來兮順以往握靈機兮測天狀葆
正命兮滅企妄受帝語兮還神京山之下
兮雲亭亭澹獨樂兮復丁則泰始兮道甫

成

雲中辭

氣芒忽兮孰窮其升淵迴旋兮挾以騰圓
為輪兮直者繩握斂散兮莫名山之柵兮
日暎彼獨黯兮上屯從豐隆兮駿奔需不
進兮愜愜下土兮垢氛靈夷猶兮曷存炯
余視兮屏息桂酒酌兮瑤席法玄化兮以
康食神功昭兮奚以跡衆甫集兮粹精愔
將逝兮廓清

春雨辭

玄陰固兮內凝滄蒼蔚兮溟沐興注兮建
瓴疾兮灑兵下土兮沃焦寥徜徉兮紫霄
來弗以趾兮去莫可招澹幽士兮空山息
視聽兮玉顏帝青廓兮籟沉虛牝汨兮潺
浚謂彼有聲兮耳益以聵疑不釋兮詢于
大塊

義婦辭

東平孫珪妻 盧氏

彼振煌煌兮過者式之黯予心之初兮孰
或測之紛兮于房伊雛孔傷饋兮于堂我
姑永望余不聊生兮矢神告之歲月遷流

兮卒迺復之鸞銜兮飛鵠松柏茂兮朝露
沐石可泐兮志莫虧儼舜英兮介壽祺

哀蘭操

盱江吳允文咸淳末與家君同佐江
東幕府允文慷慨喜論功業倚青溪
檻張髯頓足籌邊事歷歷在口傲視
府公每一至賓次席甫坐即去督府
舟抵龍灣金陵郡文武郊迎謁入皆
謝不納獨允文立江亭掩袂大慟必
求見始退未幾以王宮教授召方是

時江淮幕府僚佐言性命道德者悉
詭號為知兵得入朝言事而允文疇
昔素論兵尤竒偉可聽故得驟遷為
起居郎復直舍人院流離南方寓虔
州時文丞相總兵兵浸弱允文復以
平時論兵丞相獨傾下之兵日迫丞
相酒酣與允文論生死允文未及答
丞相呼軍校斬之噫允文要為竒男
子其未答也抑將有所為也桐九歲
時嘗拜允文於家君坐上想其風采

凜凜猶有生氣今觀所作墨蘭不自
知其悲之無從也作哀蘭操以矢之
暇日當弄絃繹聲以配易水之悲壯
幽蘭兮秋風炯命兮不逢剡剡兮素蕤零
露衰兮莫持望崇岡兮不得返悵江南兮
愈遠叢棘兮芟芟欲駕兮無轅子中野兮
屏營芳隕失兮玉零謂我為非兮吾何辭
已兮已兮其將何之幽蘭兮勿悲生失援
兮死有期思夫君兮意極從逆化兮何隙

蘭竹操

為子昂作

柔者不卑剛者不凌質質雪霜心兮以寧
且清噫招過學恭吾曷敢以從
彼高者矧彼俯者殞各全以生不媚奚慝
尋不可以枉寸能有所長亦獨何心茲奚
以傷
芟芟兮叢棘高者下兮曲者直揚靈兮靡
愆介石兮誰瀆功成者去兮孰尸其榮辱
為佩兮弗忍以刈為杖兮弗忍以戕杖弗
以扶危佩弗以服香其咎曷當履維德基
其無缺以自隙噫

黃可玉哀辭

孔子叙逸民所尚不同愛其近道吁是有
感於世也耶又曰不得中行必也狂狷乎
狷者有所不取矣剛絜養正矯矯然離垢
立竒語益不合行日以褊若是者誠不取
矣苟為之不能知知之而自警者得一人
焉曰南康黃先生可玉可玉名石翁世儒
家居廬山下少多疾父母強使為道士讀
聖人書能知其心謂道與言不可以有行
也必藏智頽放以自養約結制行非介以

為異也其著書極於憂患者困之通也嘗
曰曼容姱節支離不能也平世易足吾何
為乎是空巖隱穴廓然契領至則曰游聲
養名非士之實跂而望之去聖逾遠故其
所為詩文靜而不馳溢于哀怨則可玉自
號之曰狷叟者其果知矣可玉所居室多
唐宋雜蹟間疾作閉戶反復在手疾止危
坐若思客至馳辨榮辱可玉閉目不復答
而人始咎之嘗與余言吾鄉善醫曰劉開
能已竒疾里人病噎嘔藥不愈劉往視之

云廬山某日雲氣開君憑軒眺引之當愈
後卒如其言余少固多疾今疾益劇不知
用劉治法可已否相視大笑余來 京師
報書言茅山陶公黃庭出可急購購成當
同議中黃畢法未幾竟以疾死嗚呼可玉
言幾六十死矣曷哀也已學老子道志於
壽余不志爾謂其世無侶而哀者亦介之
的也伯玉砥礪志節歲久益湮讀其自為
銘知可哀也已故為作哀辭辭曰

朱光絜精受昭質兮煜煜靈根曷幽鬱兮

清江先生集卷一

三二

鉤深索竒儼古聖兮德充以尊履制行兮
卹彼拱壁奠皇圖兮剡以為隅衆引誣兮
响俞突梯道之非兮挾輶以行慎樞機兮
層冰在蹊踐其絜兮幽蘭允芳誠不敢裂
兮清玄返真氣始升兮謝彼苑濁超變騰
兮空山闋虛蕙烝馥兮滄焉白雲從我招
兮

林彥栗哀辭

道家言黜聰明去健羨形神始完是果為
得道耶古者上壽百二十歲竊不死之說

者則曰脩之益真其道彌親壽而無德與
名君子耻之故脩短有命遺壽焉猶可言
也名德不至其漸盡腐滅又安所取哉古
之人若是者衆矣永嘉林寬字彥栗形癯
而器溫其於學也汲汲然逐日以補有不
足焉則力探簡冊以自證其為文必達於
理而始精於詞謂詞者載理之具也理不
足焉詞雖精無益也深思以求之旁取傳
記之說勦絕傳會據宗統原以會于一復
懼其未盡是也則祕重自念將周游四方

關疑廣聞目擊而心領焉噫若可謂勤也
矣道散於九流百家彌綸者至矣其弊有
不勝言者沉濫俚雜尸坐瞠目漸入於無
聞之傳余嘗察彥栗知其心有深憂者焉
余始見於姑蘇氣和以謙再見于京師
愀然以思取士之道非一嚴畛域析毫髮
有司者之過遺逸不舉則凡吾徒在官者
誠有罪矣彥栗志不在是推彥栗之志在
問學為之而不克就若是者是真有命矣
悲夫延祐六年三月卒于京師年七十

有 其弟宇友謹哭曰吾必奉喪歸姑蘇
姑蘇吾先人所藏遂為之辭以申其哀焉
辭曰

氣清明兮受元陽德 弼中兮闇以章 挈太古兮儼九皇 播絜精兮瓊圃芳 力未具兮志則專 一葦渺兮濟巨川 慨不進兮道遠 遭白晝速兮陰風旋 數實紀兮吾何愆 路孔脩兮神獨還 靈旒翻兮木葉丹 儼夫人兮在空山 玉蓉冠兮紫佩蘭

玄教大宗師返真朝元歌九章以

前導

雲飄飄丹臺何宕蕘 中有授經之老顏 不彫三光盪摩四時代 謝神來歸靈承帝罔 敢替 謂珠庭

察陽空洞六聖儼 思九垓熙春羣黎受禧 昔騰章閭闔通金書 儼在水旱功

朝重華

五嶽奠形飛車揚鈴 翔鸞騰晃金精下視 垢濁何沈冥昔者之來 運有遭今者之往 清且遨 神虞娛

匪嚮以乘匪車以征蓋葺兮摩旌洞簫激
兮泠泠磅礴一氣兮冥冥精思道樞兮跪
頌聆
玄雲駝

玉几差差文織成龍章鳳翥相緯經大言
鴻濛小言毫銖道在瓦礫匪別區念昔人
世我非娛
啓圖籥

煌煌文成厥胤嗣昌靈之紹合永貞陟降
四紀心兢兢視彼成虧凜春冰高朗脫屣
躡世榮
靈胄光

簡兮無言默兮若存生以不生為根死以
不死為門絕學丕傳黜其知聞五千之言
世永傳
握重玄

熙洽休明紫蕤朱英侍帝左右壽考寧
啓祐玄緒何繩繩嗣昭代歲無害佩鏘鳴
兮衣絳繅
昌期運

高維松層岩岩斂玉顏養金膏鍊形以昇
朝帝青周流萬變鎮神京
佳城高

清容居士集卷第二



